



KEMENTERIAN SUMBER ASLI
DAN KELESTARIAN ALAM

TEKS SEMBAH UCAPAN

**YB NIK NAZMI NIK AHMAD
MENTERI SUMBER ASLI DAN KELESTARIAN ALAM
(NRES)**

SEMPENA

**MAJLIS PEMASYHURAN LENGGONG GEOPARK
SEBAGAI GEOPARK KEBANGSAAN**

**9 MAC 2024 (SABTU)
28 SYAABAN 1445H**

Terima kasih saudara/saudari pengacara majlis



Assalamualaikum Warahmatullahi Wabarakatuh dan Salam Sejahtera.

Terima kasih saudara/saudari pengacara majlis

Bismillahirrohmanirrohim,

Menghadap

Duli Yang Maha Mulia Paduka Seri Sultan Perak Darul Ridzuan,
Sultan Nazrin Muizzuddin Shah Ibni Almarhum Sultan Azlan
Muhibbuddin Shah Al-Maghfur-Lah,

Dan

Duli Yang Maha Mulia Raja Permaisuri Perak Darul Ridzuan, Tuanku
Zara Salim.

**Ampun Tuanku beribu-ribu ampun, sembah patik
mohon diampun,**

Segala puji bagi Allah, yang melimpahkan pelbagai kenikmatan pada
hari ini, patik dan sekalian hamba rakyat merafak sembah,
menjunjung setinggi-tinggi kasih di atas limpah perkenan Duli-Duli
Yang Maha Mulia Tuanku bercemar duli berangkat ke Majlis

Pemasyhuran Lenggong Geopark dan Perasmian Galeri Lenggong Geopark pada pagi ini.

Sesungguhnya, keberangkatan Duli-Duli Yang Maha Mulia Tuanku besar maknanya buat patik serta sekalian hamba rakyat yang bertuah mengecapi nikmat kemakmuran dan keamanan di bawah payung pemerintahan Duli Yang Maha Mulia Tuanku.

Ampun Tuanku beribu-ribu ampun, sembah patik mohon diampun,

Patik mohon perkenan untuk turut mengalu-alukan kerabat diraja yang turut mengiringi keberangkatan Duli-Duli Tuanku ke majlis ini.

Menghadap,

Duli Yang Teramat Mulia Raja Muda Perak Darul Ridzuan, Raja Jaafar Ibni Almarhum Raja Muda Musa

Dan

Duli Yang Teramat Mulia Raja Puan Besar Perak Darul Ridzuan, Raja Nazhatul Shima Binti Almarhum Sultan Idris A'fifullah Shah.

Menghadap,

Duli Yang Amat Mulia Raja DiHilir Perak Darul Ridzuan,

Raja Iskandar Dzurkarnain Ibni Almarhum Sultan Idris A'fifullah Shah

Dan

Duli Yang Amat Mulia Raja Puan Muda Perak Darul Ridzuan, Tunku Soraya Binti Almarhum Sultan Abdul Halim Mu'adzam Shah

Ampun Tuanku,

Patik dengan penuh takzim merafakkan sembah menjunjung kasih di atas limpah perkenan Duli-Duli Tuanku bercemar duli berangkat ke majlis ini bagi mengiringi Duli-Duli Yang Maha Mulia Tuanku. Sesungguhnya keberangkatan Duli-Duli Tuanku menambah keserian majlis yang dihadiri sekalian rakyat jelata.

Ampun Tuanku,

Patik mohon limpah perkenan Duli-Duli Tuanku untuk patik turut mengalu-alukan pembesar-pembesar negeri dan persekutuan, dif-dif jemputan dan sekalian yang hadir dan seterusnya menyembahkan ucapan patik.

1. Yang Amat Berhormat Menteri Besar Perak Darul Ridzuan, Dato' Seri Saarani bin Mohamad dan Isteri, Yang Amat Berbahagia Datin Aezer binti Zubin.

2. Yang Amat Berbahagia Orang Kaya Bendahara Seri Maharaja, Jeneral (Bersara) Dato Seri Diraja Tan Sri (Dr) Mohd Zahidi Bin Haji Zainuddin; dan Yang Amat Berbahagia Toh Puan Datin Seri Diraja Puan Sri Rasiah Binti Mohd Noor.

3. Yang Berhormat Dato' Mohammad Zahir Bin Abdul Khalid, Yang DiPertua Dewan Negeri Perak dan Isteri, Datin Aznee bt Abu Samah.

4. Yang Berhormat Dato' Ahmad Suaidi Bin Abdul Rahim, Setiausaha Kerajaan Negeri Perak dan isteri, Datin Che Fauziah bt Ahmad
5. Yang Berhormat Ahli-Ahli Majlis Mesyuarat Kerajaan Negeri Perak
6. Yang Dihormati Orang Besar-Orang Besar Negeri Perak,
7. YBrs. Tuan Zairasyahli Shah Bin Zakaria Pegawai Daerah Hulu Perak merangkap Pengurus Lenggong Geopark.

Seterusnya para hadirin dan hadirat yang dihormati sekalian,
Bismillahirrohmanirrohim,

Ampun Tuanku, Patik memanjatkan syukur ke hadrat Allah Rabbul ‘Alamin dan dengan penuh takzimnya merafak sembah menjunjung kasih di atas perkenan Ke bawah Duli Yang Maha Mulia Paduka Seri Sultan dan Duli Yang Maha Mulia Raja Permaisuri berangkat ke Majlis Pemasyhuran Lenggong Geopark Sebagai Geopark Kebangsaan Lenggong pada hari ini.

Ampun Tuanku, patik dengan penuh hormat dan takzimnya memohon perkenan Kebawah Duli Yang Maha Mulia Tuanku untuk menyampaikan sepatah dua kata kepada para hadirin yang turut hadir dalam majlis ini.

Ampun Tuanku,

1. Alhamdulillah syukur ke hadrat Allah Subhanahu wa Ta'ala kerana dengan izin-Nya kita dapat berkumpul di Majlis Pemasyhuran Lenggong Geopark sebagai Geopark Kebangsaan.
2. Patik mengucapkan syabas dan tahniah kepada Kerajaan Negeri Perak dan warga Lenggong kerana telah berjaya merealisasikan Pemasyhuran Lenggong Geopark yang amat membanggakan ini. Sesungguhnya majlis pada hari ini, menjadi satu manifestasi ke arah pemeliharaan, pendidikan dan pembangunan secara lestari bukan sahaja di Lenggong malah di seluruh Malaysia.
3. Di kesempatan ini patik juga ingin menzahirkan penghargaan kepada Yang Berhormat Timbalan Menteri Kementerian Dalam Negeri dan Ahli Parlimen Lenggong Datuk Seri Dr Shamsul Anuar Nasarah di atas usaha beliau ke atas pengiktirafan Lenggong Geopark sebagai sebuah Geopark Kebangsaan. Inisiatif ini juga secara tidak langsung dapat meningkatkan industri pelancongan negara serta memberi nilai tambah kepada aktiviti ekonomi masyarakat, khususnya di daerah Lenggong.

Ampun Tuanku,

4. Izinkan patik menyembah maklum bahawa berdasarkan takrifan **Pertubuhan Pendidikan, Saintifik dan Kebudayaan Pertubuhan Bangsa-Bangsa Bersatu (UNESCO)**, geopark merupakan sesuatu kawasan yang memiliki tapak warisan geologi unggul dan dipelihara secara holistik. Pendekatan UNESCO dalam membangunkan geopark bertujuan memajukan

sosioekonomi sesuatu kawasan. Ini terbukti melalui pengiktirafan geopark global yang diperolehi di negara seperti Jepun, China dan Indonesia yang telah merancakkan aktiviti pelancongan dan meningkatkan pendapatan komuniti di kawasan berkenaan.

5. Patik ingin menyembah maklum bahawa untuk memperoleh pengiktirafan status sebagai Geopark Kebangsaan dan UNESCO Global Geopark bukanlah suatu yang mudah, ibarat peribahasa mengatakan “*yang bulat tidak datang bergolek, yang pipih tidak datang melayang*”.

6. Banyak penyelidikan merangkumi pengumpulan maklumat kepelbagaian geologi bertaraf kebangsaan dan antarabangsa, biodiversiti, sejarah, arkeologi, tamadun serta budaya penduduk perlu dilaksanakan.

7. Di samping itu, calon geopark juga diwajibkan untuk mencadangkan kaedah dan badan pengurusan yang akan bertanggungjawab terhadap geopark. Pelan pembangunan pemajuan geopark melalui aktiviti geo-pelancongan juga perlu dijelaskan dan kaedah pemeliharaan geotapak, warisan sumber semulajadi, sumber budaya serta sejarah perlu digariskan secara terperinci. Promosi, hebahan dan pendidikan awam juga perlu dipergiatkan secara aktif bagi memberi kefahaman kepada pihak berkepentingan dan komuniti setempat.

8. Semua maklumat ini perlu disediakan dalam dokumen *dossier*. Dokumen itu kemudiannya diteliti dan dinilai oleh Jawatankuasa

Penilai Geopark (JPG) untuk pengiktirafan di peringkat Kebangsaan. JPG terlibat dalam membantu mengadakan bengkel jawatankuasa geokomuniti dan memberi input yang diperlukan untuk pembangunan Pelan Geokomuniti Lenggong.

Ampun Tuanku,

9. Suka patik nyatakan di sini, Kementerian Sumber Asli dan Kelestarian Alam (NRES) selaku Peneraju dan Pengerusi Jawatankuasa Geopark Kebangsaan memberi sokongan penuh terhadap usaha pembangunan geopark di dalam negara kita.

10. Usaha ini terbukti di mana dalam **tempoh 7 tahun** kebelakangan ini, Kementerian ini melalui **Jabatan Mineral dan Geosains Malaysia (JMG)**, **Jawatankuasa Geopark Kebangsaan** dan **Jawatankuasa Pelaksana Geopark** telah berjaya mengiktiraf **11 geopark kebangsaan** iaitu pada tahun 2017 (Jerai, Kedah dan Lembah Kinta, Perak); 2021 (Labuan, Wilayah Persekutuan dan Lenggong, Perak); 2022 (Gombak-Hulu Langat, Selangor, Stong, Kelantan dan Sarawak Delta, Sarawak); dan 2023 (Kenyir, Terengganu, Perlis dan Lipis, Pahang). Malah, Malaysia turut berbangga kerana memiliki **dua (2) UNESCO Global Geopark** iaitu **Langkawi, Kedah (2007)** dan **Kinabalu, Sabah (2023)**.

11. Peruntukan sebanyak **RM4 juta** telah diluluskan kepada **JMG Perak** di bawah **Rolling Plan pertama (RP1) hingga ketiga (RP3) (2021 hingga 2023)** Rancangan Malaysia ke-12 bagi pelaksanaan kajian dan penyelidikan aspek geologi di

Lenggong. Kementerian turut memperuntukkan RM1.1 juta melalui **Projek Berskala Kecil Di Bawah Program Strategik Memperkasa Rakyat Dan Ekonomi (PEMERKASA)** bagi menaiktaraf infrastruktur di Lenggong Geopark.

12. Hasil kerja naik taraf seperti pemasangan struktur promosi iaitu *billboard*, penunjuk arah, mercu tanda dan papan maklumat di geotapak, tapak biodiversiti, tapak sejarah dan budaya serta pusat penerangan komuniti Lenggong Geopark ini dapat menarik kedatangan pelancong.
13. Kementerian dengan kerjasama JMG Perak dan Penasihat Lenggong Geopark iaitu **Yang Berbahagia Prof. Dato' Dr Mokhtar bin Saidin** telah berjaya membangunkan Galeri Lenggong Geopark yang turut sama dirasmikan pada hari ini. Selain itu, pembangunan Galeri Lenggong Geopark yang ditaja oleh **Yayasan Al-Bukhary**, menunjukkan bahawa Badan-badan Bukan Kerajaan (NGO) turut bertanggungjawab melaksanakan *Corporate Social Responsibility* (CSR) dalam membantu pembangunan Lenggong Geopark.
14. Alhamdullilah, Galeri ini telah berjaya menarik perhatian dan minat pengunjung di mana **bermula pada 16 Disember 2023 (hari pembukaan Galeri Lenggong Geopark) sehingga Februari 2024**, rekod telah menunjukkan kehadiran pengunjung yang memberangsangkan iaitu seramai **2,500 orang pengunjung dalam tempoh 2 bulan setengah**.

15. Jurupandu Geopark atau *geoguide* sangat penting dalam pembangunan sesebuah geopark. *Geoguide* adalah individu yang boleh menyampaikan fakta saintifik dan nilai warisan kepada pengunjung. Kementerian ini melalui JMG sedang bekerjasama erat dengan Kementerian Pelancongan, Seni dan Budaya (MOTAC) untuk mewujudkan **Lesen Geoguide bagi kawasan Geopark di bawah Akta Industri Pelancongan, 1992 (Akta 482)**.
16. Sejumlah **229 orang geoguide** di semua geopark kebangsaan telah berjaya lulus dalam **kursus Eco-Host** anjuran MOTAC dan **JMG** iaitu salah satu pra-syarat dalam mewujudkan lesen *geoguide*.

Di Lenggong Geopark sendiri seramai **23 orang geoguide** telah berjaya lulus dalam kursus tersebut.

Ampun Tuanku,

17. Kementerian juga telah meluncurkan **Buku Pelan Pembangunan Geopark Negara 2021-2030 (PPGN 2021-2030)** dan **Pelan Pelaksanaan Geopark Negara**. Kedua-dua pelan ini telah dipersetujui dalam **Mesyuarat Majlis Perancang Fizikal Negara Ke-42 (MPFN Ke-42)** pada **18 September 2023** dan perlu dirujuk serta diguna pakai dalam semua perancangan pembangunan fizikal negara. Ini merupakan inisiatif Kementerian dalam memperkasa agenda pembangunan dan pengurusan geopark negara, memperkasa ekonomi dan kesejahteraan komuniti setempat.

18. Dalam menyokong usaha kelestarian alam juga, patik menjunjung titah Tuanku sempena Istiadat Pembukaan Rasmi Tahun Kedua Persidangan Dewan Undangan Negeri Perak Yang Ke-15 pada 23 Februari 2024 mengenai arahan untuk mengamalkan budaya hidup lebih lestari dengan mempergiatkan kempen “Tidak Menggunakan Plastik Sekali Guna” dalam kalangan rakyat Negeri Perak. Ini berikutan usaha rintis oleh Majlis Agama Islam dan Adat Melayu Perak (MAIPk) bersama Jabatan Agama Islam Perak (JAIPk) yang tidak membenarkan pelajar di Sekolah Agama berasrama penuh di negeri ini untuk menggunakan botol dan bungkus plastik bagi makanan dan minuman.
19. Dalam hal ini, patik menyambut baik titah Tuanku yang bertepatan dengan kempen Hindari Penggunaan Plastik Sekali Guna di bawah NRES dan selaras dengan Pelan Hala Tuju Kelestarian Plastik Malaysia 2021-2030. Semoga usaha ini akan diperluas kepada semua agensi di seluruh negeri Perak khususnya dan seluruh negara secara amnya.
20. Akhir sembah ucapan patik, semoga dengan pemasyhuran Geopark Kebangsaan ini, akan menambahkan semangat seluruh warga Lenggong serta badan pengurusan Lenggong Geopark dan semua ahli jawatankuasa pelaksana di bawah Majlis Penasihat Lenggong Geopark untuk bersama-sama menggembungkan tenaga memelihara serta meningkatkan kelestarian Lenggong dan bekerja keras ke arah mencapai matlamat iaitu mengangkat Lenggong sebagai UNESCO Global Geopark.
21. Ampun Tuanku, sekianlah sahaja persembahan ucapan patik. Selanjutnya patik berdoa ke hadrat Allah Subhanahu wa Taala

moga-moga ke bawah Duli Yang Maha Mulia Tuanku dan Raja Permaisuri sentiasa dalam sihat walafiat lagi dianugerahi aman sentosa. Patik Sudah dengan serangkap pantun:

Dari Putrajaya ke Kota Tampan,
Lenggong Geopark jadi pilihan,
Keunikan warisan jadi sebutan,
Agenda pembangunan lestari akan diteruskan.

Ampun Tuanku beribu-ribu ampun sembah patik mohon diampun.
Patik menjunjung kasih Tuanku. Wabillahi taufik wal hidayah
Wassalamualaikum Warahmatullahi Wabarakatuh.